0.0.1 pathama ariyasāvakasuttam

- 0. sāvatthiyam-
- 1. na bhikkhave sutavato ariyasāvakassa evam hoti: "kinnu kho kismim sati kim hoti, kissuppādā kim uppajjati kismim sati nāmarūpam hoti, kismim sati saļāyatanam hoti, kismim sati phasso hoti, kismim sati vedanā hoti, kismim sati tanhā hoti, kismim sati upādānam hoti, kismim sati bhavo hoti, kismim sati jāti hoti, kismim sati jarāmaranam hotī"ti,
- 2. atha kho bhikkhave sutavato ariyasāvakassa aparappaccayā ñāṇame vettha hoti: "imasmiṃ sati idaṃ hoti. imassuppādā idaṃ uppajjati. viññāṇe sati nāmarūpaṃ hoti. nāmarūpe sati saļāyatanaṃ hoti. saļāyatane sati phasso hoti. phasse sati vedanā hoti. vedanāya sati taṇhā hoti. taṇhāya sati upādānaṃ hoti. upādāne sati bhavo hoti. bhave sati jāti hoti. jātiyā sati jarāmaraṇaṃ hotī"ti so evaṃ pajānāti: "evaṃ ayaṃ loko samudayatī"ti.
- 3. na bhikkhave, sutavato ariyasāvakassa evam hoti: ''kim nu kho kismim asati kim na hoti, kissa nirodhā kim nirujjhati, kismim asati nāmarūpam na hoti, kismim asati saļāyatanam na hoti, kismim asati phasso na hoti, kismim asati vedanā na hoti, kismim asati tanhā na hoti, kismim asati upādānam na hoti, kismim

pts page 078

bjt page 122

asati bhavo na hoti, kismim asati jāti na hoti, kismim asati jarāmaraṇam na hotī''ti.

- 4. atha kho bhikkhave, sutavato ariyasāvakassa aparappaccayā ñāṇamevettha hoti: "imasmim asati idam na hoti. imassa nirodhā idam nirujjhati. viññāṇe asati nāmarūpam na hoti. nāmarūpe asati saļāyatanam na hoti. saļāyatane asati phasso na hoti. phasse asati vedanā na hoti. vedanāya asati taṇhā na hoti. taṇhāya asati upādānam na hoti. upādāne asati bhavo na hoti. bhave asati jāti na hoti. jātiyā asati jarāmaraṇam na hotī"ti. so evam pajānāti "evam ayam loko nirujjhatī"ti.
- 5. yato kho bhikkhave, ariyasāvako evam lokassa samudayam ca atthaṅgamam ca yathābhūtam pajānāti. ayam vuccati bhikkhave, ariyasāvako diṭṭhisampanno itipi, dassanasampanno itipi, āgato imam saddhammam itipi, passati imam saddhammam itipi, sekhena ñāṇena samannāgato itipi, sekhāya vijjāya samannāgato itipi, dhammasotam samāpanno itipi, ariyo nibbedhikapañño itipi, amatadvāram āhacca tiṭṭhati itipī'ti.